

# MALUA PAPA



Tala mai le Kolisi Faa-Faifeau i Malua / News from Malua Theological College

## TALOFA LAVA!

E faatalofa atu i le mamalu o le au faitau uma o lenei lomiga o le Maluapapa, i le suafoa o lo tatou Alii o Iesu Keriso. Malo le soifua manuia. E faatalofa atu foi i le paia ma le mamalu o le Ekalesia ua tauaofia i Malua mo lana Fono Tele i lenei tausaga 2014, lau afioga i le Taitaifono ma le Sui Taitaifono faapea le Laulau o le Fono Tele, lau afioga i le Taitaifono ma le paia o le Komiti a le Au Toeaina, le paia i le nofo a Komiti uma a le Ekalesia, faapea le mamalu o Sui Usufono o le Fono Tele, ma le loaloa o le Ekalesia i ona tulaga faalupe.

Ia i le Atua pea le viiga ma le faafetai, ona o lana pule faasoifua ma lona agalelei tele ua tatou aulia mai ai lenei vaitau taua o le tausaga i le tauaofia ai o le Fono Tele a le Ekalesia. E ui ina ua fāi i lagi le folauga a nisi o Tama ma Tina o le Ekalesia i lenei tausaga, ae tatou te faafetaia pea le Atua i lona faaaogaina o tatou tagata faatauavaa mo lana feau ma lana galuega faaola i le lalolagi.

O le lomiga muamua lenei o le Maluapapa i lenei tausaga. O se avanoa taua e faailoa ai i le Ekalesia ma le atunuu, nisi o tala o galuega ma polokalame o loo feagai ma faiaoga ma a'oa'o i totonu o le Kolisi. Ua matauina i lenei tausaga le iai o nai suiga i le laumua nei, e le gata i ona fale ma ona pa, ae faapea foi i polokalame a'oga o loo faia ai.



Susuga Rev. Dr. Afereti Uili F.S.  
Pule o le Kolisi

O le tausaga lenei ua amatalia ai galuega o le fausia o le Fale Tapua'i fou o le Ekalesia i Malua nei. Alofa mai le Atua ia sōloga manuia fuafuaga uma o lenei faamoemoe taua. O le Aoga Tusi Paia foi, talu mai le Fono Tele i le tausaga na te'a nei, o loo ua faia nei ona vasega uma i le taulaga i Apia.

Avea ia lenei avanoa e momoli atu ai le faamalo ma le faafetai tele i le Ekalesia ona o la outou tatalo e le aunoa mo le Kolisi i Malua nei, faapea foi lo outou lagolagoina o le Kolisi i le tele o itu, ua manuia ai ana polokalame ma galuega o loo feagai ai. E fia faamauina foi le faafetai faapitoa i le Komiti o Malua ma le Komiti a le Au Toeaina, o Tamā lava o le Kolisi Faafaifeau i Malua. Malo le faapalepale ma le alofa faa-tama i le Kolisi, ae maise o lau tatalo aua le manuia o le alo faiva o le Kolisi i ona tiute e pei ona faato-

nuina ai e le Ekalesia. Malo foi faafetai i le taitaiga o lenei Kolisi i auala uma e manuia ai lona aga'i i luma.

E momoli atu foi le faamalo ma le faafetai tele, i le susuga i le Toeaina Faatonu ia Popo Su'a o lē sa galue punoua'i i le Komiti o Malua i tausaga e tele seia oo mai i lenei fonotele. Malo le tauata'i ma le faatoatoa, ua a'e manuia faiva sa feagai ai i le Ekalesia. Faafetai i le tofa faale-Atua na faasoa mai mo le Kolisi, ae maise o le alofa faamaoni sa fai ma ta'iala taua mo i matou, i lo matou foi ola auaina i le Atua. Ia faamanuia tele le Atua i lava-siga uma o le soifuaga o le a feagai ma lau susuga ma le faletua ia Epenesa i le lumanai.

E fia faamauina foi alofaaga o le Kolisi mo le susuga i le Toeaina ia Senetenari Iupeli ma le faletua ia Rosettastone faapea le susuga i le Faifeau ia Faatau-sau Onesemo ma le faletua ia Tama-sailau, o e ua penisione malolo i lenei tausaga. Malo le tauata'i i le galuega a le Atua, ia faamanuia le Atua i laasaga fou o le soifua i le lumana'i.

Tau ia ina ia ta'ita'iina e le Agaga o le Atua le faatofala'iga a le Fono Tele a le Ekalesia i lenei tausaga, ma ia faatalitali pea ma le filemu i Lana faasinoga faale-Atua mo i tatou.

“O le alofa, o le faasinomaga lea o le Ekalesia.”

Manuia le Fono Tele.

Soifua,  
Afereti Uili  
Pule o le Kolisi.

### SILASILA I TOTONU

|                                           |   |                                        |       |
|-------------------------------------------|---|----------------------------------------|-------|
| Talofa Lava! - Susuga Rev Dr Afereti Uili | 1 | CD                                     | 8     |
| Tautai A'e & CWM                          | 2 | Malua Journal & Faiaoga Fou            | 9     |
| Faauga o Aukilani Tuiai                   | 3 | Faamuli Eseta & International Students | 10    |
| Faauga Faifeau Samoa 2014                 | 4 | Motu le pa ua iloa                     | 11    |
| Iupeli Fou                                | 5 | Vaaga Eseeese i le Kolisi              | 12-13 |
| Vaaga Eseeese Fono Tele 2014              | 6 | Ripoti                                 | 14-15 |
| Library                                   | 7 | Taaloga Taga Polo 2014                 | 16    |

# TAUTAI A'E

*Faifeau malolo manumalo*

*Faamalo faafetai le galulue punoua'i ma le onosa'i i le galuega a le Atua i tausaga e tele.  
Ia faamanuia le Atua ma puipui i lo outou soifua.*



Popo Su'a FT ma le faletua ia  
Epenesa  
Ekalesia i Ketesemane  
Matagaluega Niu Sila i Saute




Senetenari Iupeli FT ma le faletua ia  
Rosettastone  
Ekalesia i Lower Hutt  
Matagaluega Niu Sila i Saute



Faatausau Onesemo FS ma le faletua ia  
Tamasailau  
Ekalesia i Falevao  
Matagaluega Apia Sasae



## Council for World Mission Pacific Regional Assembly Auckland, New Zealand 25 – 30 April 2014



“Turning the tides of Tradition” was the focal theme for the CWM Pacific Regional gathering held in Auckland, New Zealand on the 25<sup>th</sup> – 30<sup>th</sup> April 2014. While there is no denying of the importance of “traditions” in the lives of any community and people, traditions can also have negative side-effects, as they can also be oppressive and work to deny others of true justice. The purpose thus of the gathering is to encourage a more critical analysis of traditions and its impacts on the lives of the people within the community. Critical analysis and interpretation can also lead to reforms for the benefit of all.

The meeting was attended by members of most of the Pacific Island nations. The delegation from Samoa consisted of the Deputy Chairman of the General Assembly, Congregational Christian Church Samoa, Reverend Elder Tautiaga Senara and his wife Olita. They were accompanied by the Principal of Malua Theological College, Rev. Dr. Afereti Uili and wife, Samata Uili. Rev. Dr Uili was invited as a resource person in which he conducted bible sessions throughout the week, bringing Biblical and Theological insights in association with the theme and issues at hand.

Other papers and discussions during the gathering focussed on the traditions and the youth, traditions and women, gender issues, climate change, etc... All can be found by following this link below...

<http://www.cwmpacific.org.nz/event-latest.html#keynoteaddresses>


*Malo le faatoatoa i le usugafono mamalu!*





# MALO LE TAU, MALO LE FINAU

## *Susuga Faifeau Faiaoga Fomai. Aukilani Tuiai*



O le aso 16 Tesema 2013 na tauaaoina ai le faailoga taualoa o le Fomai o le Tofa Mamao (*Doctor of Philosophy*), i le vaega o le Talafaasolopito o le Lotu, i le susuga i le faifeau faiaoga fomai, Aukilani Tuiai, mai le Iunivesite o Charles Sturt, Sini Ausetalia. O lenei faamanuiaga o se taunuuga o le galuega suesue sa tausinio ma fitaituga ai le susuga ia Aukilani mo tausaga e fa, a o se faaeaina foi mo le faletua ia Mau e tusa ai ma le tapuaiga ma le lagolago malosi ao feagai ai le Faifeau Fomai ma le taumafai. O se fiafiaga tele foi aua le tapuaiga i aiga, o nuu ma le Ekalesia, faapea foi ma le nofo tatalo a le Kolisi Faafaifeau. Ia saga faateleina pea la le viiga o lo tatou Matai Sili i le Lagi, o le ona le malosi, le poto ma le mafai e manuia ai soo se faiva. *Ua faamalo le fai o le faiva, o lea ua ae manumalo!*

O le susuga ia Aukilani na faaiuina le taumafai mai le Kolisi Faafaifeau i le tausaga 2000 ma le faailoga o le *Bachelor of Divinity*. Ona avea lea ma sikolasipi a le Ekalesia i le Iunivesite i Geneva ma faauuina ai i le faailoga o le *Masters of Theology* i le tausaga 2002. Na toe talii mai lea ma galue ai i le galuega faafaiaoga i le Kolisi Faafaifeau i le Matagaluega o le Talafaasolopito o le Lotu. O le tausaga e 2007 na toe tuua ai le mafutaga mo le faalauteleina i le itu tau le aoaoga. O lea la ua tau lau o le faamoemoe ma ua ae malo le faatamasoaliiga ma ua famanuiaina i le faailoga o le Fomai o le Tofa Mamao (*PhD*). O le galuega suesue ua faaulutalaina faapea, *"The Congregational Christian Church of Samoa, 1962 – 2002: A Study of the Issue and Policies that have shaped the Independent Church."* O se taumafaiga o loo taulai ai le vaai i aafiaga o le lotu ma le pulega i faiga faalenuu ma afioaga. O loo silasila foi le tusiga i le aafia ai o faiga faaiuga a le lotu e tusa ma lenei fesootaiga.

O loo ua momoli mai lana faafetai tele i le tapuaiga a le Ekalesia aemaise o le avanoa sa tuuina mai e Tama o le Ekalesia e faaaauai ai le aoga. O loo faamauiina foi le faafetai tele i le Tama Porofesa ia Otele Perelini, le susuga i le Alii Pule o le Kolisi ia Rev. Dr Afereti Uili faapea le aiga faiaoga mo le tatalo ma le tapuaiga.

O loo galue nei Aukilani ma faauluuluga o le Matagaluega o le Talafaasolopito a le Lotu. O loo feagai foi ma le vaaia o le faletusi a le Kolisi i ona itu uma. O loo aofia foi i le komiti o loo nafa ma tulaga o tusitusiga (*writing skills*) a le tausaga muamua ma le tausaga tolu; faapea foi le Komiti o loo feagai ma suesuega faapitoa a aoao o le tausaga tolu ma le tausaga fa (*thesis seminar*). O loo faaaogaina foi ana taleni i le komiti o le Malua Journal.

Ua faamalo le tau, malo le finau i lau susuga i le faifeau faiaoga fomai!!! Ia faamanuia le Atua i lau susuga ma le aiga, ma ia faaaogaina pea le soifua e auuina ai mo Ia ma lana Talalelei.







## Faauuina Tofiga o Faifeau Samoa (FS)

Sa faatumulia le Maota o le Mafutaga a Tina i le Aso Toonai na sei mavae atu nei, i le paia lasilasi o le Ekalesia, tainane foi o aiga, uo ma e masani, o faifeau faauu e toa sefulu ma le toalua ma o latou faletua, ua laasia le isi vaega taua o le soifua auauna i le Atua ma Lana galuega, ina ua faauuina e avea ma Faifeau Samoa (FS), e faatinoina sakarameta paia o le Faamanatuga ma le Papatisoga. O lenei laasaga fou ua ausia ina ua maea lo latou soifua auauna i le Ekalesia mo tausaga e lua, ma ua faamaonia mai foi e le Komiti Au Toeaina, lo latou agavaa ai e faatino ia sauniga taua a le Ekalesia, aemaise o le galuega talai a le Ekalesia, e ala i le upu folafola. Aperamo Tufuga ma le faletua ia Ann, Matagaluega Fa'asaleleaga, o loo galue i le Ofisa Tutotonu. Apineru Fasavalu ma le faletua ia Winona, Matagaluega Apia i Sisifo, o loo galue nei i le Kolisi Faifeau Malua. Atapana Tupuola ma le faletua ia Etevisse, Matagaluega Falealili Sisifo, o loo galue i le Ofisa o Aoaoga Kerisiano. Eric Mulitalo ma le faletua ia Amata, o loo tausia nei le

Ekalesia i Fasitootai, i le Matagaluega Aana. John Ah Honi ma le faletua ia Fesu'ea'i, o loo galue nei o le Faifeau Misionare i Taradale, Hawkes Bay, i le Matagaluega Niu Sila i Saute. Lealao'o Polutea ma le faletua ia Litia, Matagaluega Ituotane, o loo galue nei o le Sui Komesina o Fanua, i le Ofisa Tutotonu. Malotau Lafolafoga ma le faletua ia Sina, Matagaluega Falealili i Sisifo, o loo faiaoga i le Kolisi o Nuuasala. Reupena Nofoaiga ma le faletua ia Vaipou, o loo galue nei o le Faifeau Tausinuu i le Ekalesia i Elise Fou, Matagaluega Faleata. Sauleone Tanoi ma le faletua ia Lipale, Matagaluega Faleata, o loo faiaoga nei i le Kolisi o Nuuasala. Setefano Logovi'i ma le faletua ia Maria, Matagaluega Fa'asalele'aga, o loo faiaoga nei i le Kolisi i Tuasivi. Tanuri Pesaeli ma le faletua ia Sanaima, Matagaluega Lotofaga, Lepa, Aleipata, o loo galue nei i le Ofisa o Aoaoga Kerisiano. Tupou Tanielu ma le faletua ia Luisa, o loo avea nei ma Faifeau Tausinuu i le Ekalesia i Nofaalii, Matagaluega A'ana.





# AMATA GALUEGA O LE MAOTA TAPUAI O LE IUPELI FOU



O le lagona o le faafetai i le Atua ma le loto ua faaga'e'etia i le fiafia, sa molimauina i le sauniga lotu, e amatalia ai le fausiaina o le maota tapuai fou o le Ekalesia, le Maota Tapuai o le Iupeli. O lenei sauniga sa taitaiina e le Taitaifono o le Fono Tele ia Tavita Roma. O le Failautusi o le Komiti Au Toeaina, ia Kerisiano Soti sa fofogaina afioga paia a le Atua faatasi ai ma talosaga, a o le Sui Taitaifono o le Fono Tele, ia Tautiaga Senara, sa saunia se upu faalaeiau, ina ia sao ma uli le alo faiva o le afioga i le Agaiotupu ma le Falefa o le aiga Salemalama mo lea faamoemoe.

O le susuga i le Failautusi Aoao, le faifeau fomai ia Iutisone Salevao sa tolaulauina faamatalaga auiliili o le faamoemoe, e pei ona i ai konekarate eseese e fa o le a feagai ma le faatinoina o le galuega. (1) O le kamupani a le Evaeva o le a nafa lea ma le suaina o le fanua e fausia ai le faavae o le fale. (2) O le kamupani o le Shanghai Construction, o le a feagai lea ma le fausia o le faavae, faatasi ai ma le au-ivi atoa o le fale, e fausia mai uamea. (3) O le kamupani a le Fletcher Construction o le a nafa lea ma le fausia o le tino atoa o le fale, ma le (4) o le kamupani lea a le South Pacific Cladding, o le a faapiiina le tino i fafo o le fale, e pei ona latou toe faafouina ai le Maota o le Ioane Viliamu i Tamaligi.

O le fua faatatau o le Iupeli fou e pei ona sa saunoa iai le susuga ia Salevao, e 51 mita le umi, 31 mita le lau-

tele, ma le 23 mita lona maua. E iai foi se vaega i le pito i luma e faaopoopo i luga lona umi mo le isi 11 mita, ona 34 mita ai lea o le vaega pito i luma o le fale fou. E le o iloa tonu se taimi e ono maea ai le galuega.

E toatolu sui mai le potopotoga i lea aso sa valaaulia e le susuga ia Salevao, latou te suaina ulua'i suō tosina, e faailoga ai le amatalia aloaia o le galuega. O le Taitaifono o le Fono Tele, le Toeaina Faatonu ia Tavita Roma sa fai ma sui o le Ekalesia Aoao, o le Toeaina Malolo Manumalo ia Situfu Tanielu sa fai ma sui o tamā ma tinā matutua uma o le Ekalesia o loo tapua'ia le galuega, a o le afioga i le Tama-aiga, Sui o le Fono o Sui Tofia, le afioga ia Tuimalealiifano Vaaletoa Sualauvi II sa fai ma sui o le Malo o Samoa.

Sa faatumulia lea aso i susuga i toeaiina ma o latou faletua, le nofo a faafeagaiga ma o latou faletua ma le toetele o le Ekalesia sa auai i lea aso taua. Sa faapea foi ona auai mai nisi o sui mamalu o le malo, le afioga i le Tama-aiga faapea nisi o minisita o le kapeneta, tainane foi le Alii Pule o le Kolisi Faafaifeau i Malua nei ma nisi o le aiga faiaoga.

Sa faaiiina lea faamoemoe i se taumafataga i le Fale Senetenari, sa saunia e le Ofisa Tutotonu o le Ekalesia mai Tamaligi.

Tatou talosia ia lea faamoemoe taua o le Ekalesia, ina ia faataunuaina i le manuia ma le filemu mai le Alii.





# Vaaiaga i le Fono Tele





# Malua Library

## O se Lipoti mo le Faletusi i le vaituuaga muamua.

Ua telē le suiga ua iai nei le faletusi, ona o le faamoemoe ia si'itia le tulaga mo a'oa'oga. Ua faaleleia atili nisi o vaega sa faalētonu ina ia malu puipuia ma saogālemū tusi, ma fesoasoani e taofi le ea malūlu i totonu o le faletusi. O le computer lab, i luga o le fogāfalelua, ua vaeluaina i le potu a'oga ma le potu mo le computer lab. O le potu a'oga, ua iai le faamoemoe e avea ma se audio-visual room, e fa'aali ma matamata ai ata tifaga mo a'oa'oga. Ua faaitiitia le Computer lab, ua na'o le tolu pe fa computers ua iai nei. E mafua lea tulaga, ona ua tele a'oa'o ua iai lava a latou computers po'o laptops.

Ua iai fo'i togālaau matagofie ua si'osi'omia ai le faletusi. O galuega faatino lava nei sa nafa ma ta'ita'i ai le faletua o le Sui Pule, le faletua ia Lalokava Limā ma le faletua ia Maria Samuelu.

I le masina o Aperila sa taunuu mai ai tusi e fasefulu, sa faimeaalofa mai ai Valentin Tkach, o sē tasi o toeaina sa galue i se faletusi i Kalefonia, ma ua litaea nei.


Ua tauunuu mai fo'i se meaalofo mai le Iunivesite o Berkley i Kalefonia. O tusi nei e sefulu, o digital copies, e faatatau i le tala faasolopito o le Ekalesia i le Pasefika, ma o loo i totonu nei o le vaega e tuu ai lomiga faamau-mauina (Archives).

Ae avea ia lenei avanoa e momoli atu le faafetai tele i le susuga i le Alii Pule mo suiga lelei ua mafai ona faati-noina, auā le malu puipuia ma le faaleleia atili o le auaunaga i totonu o le faletusi.





# CD - Kolisi Fa'afaifeau Malua, 2014



O le CD o pese ma vi'iga i le Atua a le Kolisi Fa'afaifeau i Malua i lenei tausaga 2014, o se la'asaga taua lea i le galuega fa'afaifeau a le Kolisi i le fa'asalalauina ma le fa'atumauina o le molimau i le Talalelei ia Iesu Keriso. O le aso 25 Mati, 2014 na amata ai le pu'eina o pese seia fa'auma i le aso 5 Aperila, 2014. O se galuega faigata, ae ua fa'ai'uina i le manuia ma le fiasia i le fesoasoani mai o le Atua.

O le tausaga e 1998 na ulua'i fa'amauiina ai le galuega o pesega fa'ale agaga a le Kolisi e ala i lana cassette sa pu'eina ai. O lea fo'i la ua toe fa'aauau pea lena galuega e ala i le CD ua tapena ma saunia e le Kolisi i lenei fo'i tausaga, 2014. O se galuega sa taumafai lava i le mafai o le Kolisi i le tulaga tau tupe, aemaise o le silafia ma taleni mai le Atua e fa'atino ai. Peita'i na papa'i mai pea le fesoasoani sili a le Agaga Paia e fa'atino ai lenei galuega i mea uma lava - le tino, mafaufau, ma le agaga. Telē le sao o taleni a A'oa'o o le Kolisi (le vaega o Asafo) i le saunia o lenei CD. O le kamupani pu'e pese (Recording studio) a le Keila Records mai Niu Sila i lalo o le ta'ita'iga a le susuga Victor Keil sa nafa ma lenei

galuega tele. O le aufaipese masani lava a le Kolisi Fa'afaifeau sa usuina pese uma. O pese lava a le Ekalesia Fa'apotopotoga Kerisiano Samoa (EFKS) o loo fa'aaogaina ina ua maua le fa'atanaga mai le Failautusi Aoa o le EFKS mo le fa'aaogaina o nei pese. E fia fa'aleoina ai le agaga fa'afetai tele ia i latou uma lava na mafai ona ofoina mai le fesoasoani i auala eseese i le tapenaina o lenei CD. O le fa'afetai fa'apitoa i le susuga i le Ali'i Pule ia Rev. Dr Afereti Uili ma le Faletua ia Samata, le susuga i le Sui Pule, ma le Aiga Faiaoga ma faletua, mo le lagolago malosi i lenei galuega ua i'u ai ma le manuia. E fa'afetaia fo'i le mafutaga a A'oa'o ma Faletua, aemaise o le Suga Fa'ai'uaso 2014 i lo latou sao taua i lenei galuega. O mea ua lelei ona tatou fai mo le Talalelei a Keriso, ia fai lea ma vi'iga o le Atua. Tatou tatalo i le Atua ia aoga lenei CD e fai ma sao o le Kolisi Fa'afaifeau i Malua i le fa'asalalauina o le Talalelei a Iesu Keriso i Samoa ma atunu'u uma ua mafai ona o'o i ai le galuega fa'amisionare a le EFKS.

Dr Fa'alepo A Tuisuga (FS)



1. Fa'afetai i le Atua - 92
2. Ua fai mai nei le Tusi Sa - 117
3. Ua fa'afetai ua maua mai - 204
4. Iesu ia e alofa mai - 113
5. Ina vivi'i i tatou nei - 2
6. O sacred head! Sore wounded
7. Tala'i le Tala Moni - 185
8. Le Ali'i e, o lau pule - 196
9. Ina tatou fa'afetai - 48
10. A ou manatu ifo nei - 40
11. Le malo e lelei - 79
12. Tumau mai oe, lo'u nei matai
13. Iesu matou te fa'afetai - 81






# MALUA JOURNAL

O le lomiga lona lua lenei o le *Malua Journal*. O lenei tusi o lo'o aofia ai tusitusiga ma suesuega ua saunia e le Alii Pule ma le aiga faiaoga i mataupu tau i le Tusi Paia, Mataupu Silisili, Talafaasolopito o le Lotu, faapea le Faiva Alofilima o le Mataupu Silisili (*Practical Theology*). Komiti Faafoe: Maafala Lima (FS)(Sui Pule), Alesana Eteuati (FS), Dr Faalepo Tuisuga (FS), Dr Peletisala Lima (FS), Dr. Aukilani Tui'ai (FS) ma Apineru Fasavalu (FS). O nisi nei o suesuega a faiaoga o loo faamauina i lenei lomiga:

- "Chaos the Wild and Justice in the world: A Reading of Job 39 & 41." by Afrereti Uili (FS)
- 'Faauta o le tagata ai tele ma le inu uaina' (Luka 7:34): Iesu ma le Au-Faalaa. by Alesana Eteuati (FS)
- *Jesus Christ and the Nofo-tane* by Michiko Ete Lima
- *O le Talafaasolopito o le Komiti o Aoga 1962-1911* by Aukilani Tui'ai (FS)
- "Atinae o Tagata Tafafao Maimoa mai Fafo ma Ekalesia: Nei manao i le ia ae maumau ai le upega'" by Faalepo Tuisuga (FS)



## FAIAOGA FOU



O le susuga ia Reupena Maulolo ma Fuarosa ma le fanau sa faaiuina le taumafai i le Kolisi i Malua i le 2011 ma le faailoga o le *Bachelor of Divinity*. O le tausaga na tea nei 2013 na faamanuiaina ai le taumafai i le faailoga o le *Masters of Theology* mai le Kolisi Faafaifeau a le Pasefika i Suva, Fiti. O loo galue nei i le Matagaluega o le Faiva Alofilima o le Mataupu Silisili (*Practical Theology*). O le susuga ia Maulolo ma le aiga e mai le Ekalesia i Magere i Sisifo, Matagaluega a Manukau.

O le susuga ia Semikueva Faatoafe ma Vesia ma le fanau sa faaiuina foi le taumafai mai le Kolisi i le 2011 ma le faailoga o le *Bachelor of Divinity*. Ua maea mai foi le taumafaiga e pei ona iai i le Kolisi Faafaifeau a le Pasefika i Suva i le tausaga na tea nei, 2013. Ua faamanuiaina i le faailoga o le *Masters of Theology* ma o loo ua galue nei i le galuega faafaiaoga i le Aoga Tusi Paia a Malua i le Matagaluega o le Feagaiga Fou (*New Testament*). O le susuga i le faiaoga ma le aiga e mai le Ekalesia i Leauvaa, Matagaluega a Malua.



O le susuga ia Howard Leiataua ma Vanessa ma le aiga ua taliu mai foi i le maea ai o le faailoga o le *Masters of Theology* mai le Kolisi Faafaifeau o le Pasefika i Suva. Sa faaiuina le taumafai mai le Kolisi i Malua i le tausaga 2011 ma le faailoga o le *Bachelor of Divinity*. O loo ua galue nei le faiaoga i le Aoga Tusi Paia a Malua i Matagaluega o le Talafaasolopito o le Ekalesia (*Church History*) faapea ma le Feagaiga Tuai (*Old Testament*). O le susuga ia Leiataua ma le aiga e mai le Ekalesia i Sogi, Matagaluega a Apia.



# FAAMULI O LE ESETA

## Tausaga Muamua 2014

E tusa ai ma tulaga masani a le Kolisi, o le faamuli lenei e feagai ai lea ma le Suega Tausaga Muamua, i le taitaiga a Afereti ma le faletua ia Samata, faapea le lagolagosua a Solipo ma le faletua ia Lile. O se avanoa taua lea e mafuta faatasi ai le vasega e fefa'asoa'ai ai manatu ma lagona, ma faatumauiina ai mafutaga.

O galuega masani lava o le faamamaina ma le leoleoina o le aai, fafagaina o mea fafaga, ma isi galuega o moomia. Sa faapea foi ona o matou fesoasoani i le faapipi'iina o maa-fola (*tiles*) mo le fale o le mafutaga a Tina, faatasi ai ma le fausiaina o se tulaga simā mo se tanevai, e tua i ai lea fale. Ua maea ona faatinoina ia galuega uma. Sa feagai foi faletua ma le tapenaina o le chapel, mo sauniga o le Aso Maliu ma le Aso Sa o le Toetu, faapea le fesoasoani i gasegase ma isi a latou galuega masani.

O Afereti Uili sa taitaiina sauniga lotu o le Aso Maliu faapea foi le Aso Sa o le Toetu. Sa tapenaina e le faamuli se toonai mo le Aso Sa o le Toetu. O le Sui Pule ia Maafala Limā sa saunoa, e faafetaia le Alii Pule, faapea Solipo ma o la faletua, ma le faamuli, ma tuuina mai faamanuiaga mo lenei vasega.

Sa faaiu lea faamoemoe i le saunoaga a Afereti, e faaopoopo i le faafetai a le Sui Pule, faatasi ai ma faamanuiaga mo lenei vasega, e tusa ai ma le faamuli.

Faafetai mo timaiga ma faamanuiaga, ma ia fai lea ma viiga mo le Atua.

Valoaga Ropati (Taitaifono – Suega Tausaga Muamua, 2014)

### Lisi o le Tausaga Muamua ma Matagaluega

- Aneteria Ulutui (*Niusaelese*)
- Arthur Milo BA (*Manukau*)
- Atapana Lau (*Faleata*)
- Auatama Tofaeono ma le Faletua ia Katenari (*Niusaelese*)
- Clark Stowers ma le Faletua ia Fofoga (*Itu-o-Tane*)
- Fa'amoana Le'aupepe (*Falealili-i-Sisifo*)
- Faau BJ Faau (*Malua*)
- Fa'auli Maiava ma le Faletua ia Veronica (*Falealili-i-Sisifo*)
- Fiafiaga Lusama \*
- Iese Uele BA ma le Faletua ia Siaauli (*Aukilani*)
- Keeb'a Tira *DipTh* \*\*
- Manao Stanley ma le Faletua ia Talila \*
- Panapa Jr Panapa ma le Faletua ia Fesueai (*Faleata*)
- Pao Pele (*Niusaelese*)
- Peniamina Fa'alave ma le Faletua ia Rita (*Manukau*)
- Risatisone Taua ma le Faletua ia Suitupe (*Malua*)
- Steven Palala (*Falealili-i-Sisifo*)
- Tieem Metari *DipTh* \*\*
- Tuto'atasi To'alima BSc ma le Faletua ia Fetu BSc (*Apia-i-Sasa'e*)
- Vaegato'oto'o Magele (*Fa'asalele'aga*)
- Valo'aga Ropati (*Manukau*)



## New International Students



Fiafiaga Lusama  
\* Aoao Sikolasipi mai le Ekalesia Kelisiano Tuvalu



Manao Stanley ma le Faletua ia Talila  
\* Aoao Sikolasipi mai le Ekalesia Kelisiano Tuvalu



Keeb'a Tira *DipTh*  
\*\* Aoao Sikolasipi mai le Kiribati Protestant Church



Tieem Metari *DipTh*  
\*\* Aoao Sikolasipi mai le Kiribati Protestant Church



# IA MOTU LE PA A UA ILOA...

## Fa'aipoipoiga a le Kolisi:

I le tu'uaga umi a le Kolisi 2013-2014, sa fa'apena ona fa'apaia ai nisi o a'oa'o ma o latou faletua e ala i fa'aipoipoga. O susuga i fa'ai'uaso ia Ulale & Usufono Sakaio (21 Tesema 2013), Mose & Uputaua Malaga (11 Ianuari 2014), fa'apea ma Epati & Vicky Sooula (18 Ianuari 2014). *God bless and may your homes have plenty of food!*

## Pepe Fou:

Ua fa'aopoopoina le faitau aofa'i o tagata i le Kolisi e ala i meaalofo tāua pei ona fa'amanuiaina ai i pepe fou. O i latou ia ua o'o iai le fa'asoa mamana a lo tatou Alii, o le a'oa'o ia Motusaga Lesa ma le faletua ia Tanya, a'oa'o ia Fatilua Fatilua ma le faletua ia Vaituutuu, faapea le aoao ia Tutoatasi Toalima ma le faletua Fetu. *God bless and fuatele pea le niu mo le Atua ma Lona Malo!*

## Faafetai Aiava & Aiga mo le PTC:

O le susuga ia Faafetai Aiava ma le aiga o loo ua faaauau nei le taumafai i le faailoga o le Fomai o le Tofa Mamao (*Doctor of Philosophy*) i le Kolisi Faafaifeau o le Pasefika i Suva (PTC). Na faaiuina le taumafai a le susuga ia Aiava mai le Kolisi i Malua i le 2011 ma le faailoga o le Bachelor of Theology, ma faaauau ai loa i le PTC i Suva mo lana Masters in Theology. O loo ua faaauau nei i aoaga i lalo o le polokalame a le PTC mo le atiaeina o lana aufaigaluega. O loo faamoemoe e avea ai ma faiaoga i le PTC i le maea ai o le taumafai. *Tau ina faamanuia pea le Atua i faamoemoga uma.*

## Vasega mo Faletua o Aoao:

O le kuata lua o le tausaga nei ua faatulagaina ai nisi o mataupu o le Tusi Paia, Mataupu Silisili, Talafaasolopito o le Lotu ma le Galuega Faafaifeau e aoaga ai faletua o aoao. O se faiga ina ia fesoasoani mo le tapenaina i le isi lea o itu taua mo le galuega, e faaopoopo i o latou faiva alofi lima masani e pei ona aoaoina ai i le polokalame mo le Mafutaga a Tina. Mo uluai tausaga e lua i totonu o le Kolisi, e aoao ai faatomuaga i mataupu eseese. O le lua tausaga mulimuli, o loo faamamafaina ai le galuega faafaifeau mo le tapenapena atili ai mo le tuua o le Kolisi. O nei foi mataupu o le a feagai pea ma le susuga i le Alii Pule, ma le aiga faiaoga o le Kolisi.

## Susuga Makesi Neemia & Aiga

O loo faatalitali pea ma le fialia e le Alii Pule ma le Kolisi i Malua le taunuu mai o le susuga i le faifeau faiaoga ia Makesi Neemia ma le aiga i le kuata lua e pei ona faatulagaina. O le susuga ia Neemia o loo feagai pea ma le taumafai i le faailoga o le Fomai o le Tafa Mamao (*Doctor of Philosophy*) i Melepone, Ausetalia.





# Vaaiga i le Kolisi









## MAFUTAGA A'OA'O

O nisi nei o faatinoga autu faapea galuega faatino sa feagai ai le mafutaga i le kuata ua faaiuina. O loo faaauau pea tapuaiga a le mafutaga i afiafi o le Aso Lua ma Aso Faraile o vaiaso taitasi, o se fesoasoani tele lea tapenaina atili mo le galuega fai-lotu.

O loo tauave pea le nafa tausi o le Kolisi i le vaaia ma le faamamaina o le lotoa a le Ekalesia. O se faamoemoe taua, ina ia tulaga lelei ma mama le laumua o le Ekalesia mai lava i ona luma-fale seia pa'ia le siufanua, e maua ai foi le malosi faafouina ma le soifua maloloina.

O lenei foi kuata na mafai ai ona tuufaatasia ai le lipine poo le kaseti (CD) pese lotu lona lua (Volume 2) a le Kolisi e ala i lana aufaipese.

E avea lenei avanoa taua, e faaleoina ai le agaga faafetai i le Susuga i le Alii Pule ia Afereti Uili ma le faletua ia

Samata, le Sui-Pule ia Maafala Limā ma le faletua ia Lalokava, faapea le paia o le aiga faiaoga ma faletua; e tusa ai ma le limataitai'ina o polokalame fai o lenei kuata ua faaiuina ma le manuia. Ua malo fai o le faiva.

Momoli foi le faamalo i le Mafutaga Aoao ma Faletua 2014, mo galuega faapea lo outou tautua tuavae aua le Kolisi, aemaise o le Atua ma lo tatou ola valaauina. Ia fai ma viiga o le Atua. O le faafetai faapitoa e mo matua ma aiga, nuu faapea Ekalesia pele o tapuai mai. Malo tatalo, faafetai alofa, o loo sisila le lagi i lo outou agalelei, aua o i tatou uma o tagata faatali-timu i manuia o le Atua. Ia faamanuia tele le Atua.

Soifua.

Faaaliga Auvele.

(Peresetene: Mafutaga Aoao ma Faletua).

## MAFUTAGA FALETUA

Faatalofa atu i le Suafa Mamalu o lo tatou Alii o Iesu Keriso. O se oototoga lenei mai le Mafutaga Faletua o A'oa'o a le Kolisi Faafaifeau e tusa ai foi ma galuega ma polokalame o loo faatinoina.

E to'a fasefulu ma le fitu le aofai o la matou mafutaga atoa i lenei tausaga 2014. E to'a sefulu le Tausaga Muamua, sefulu lua le Tausaga Lua, to'a fitu Lagolago po o Tausaga Tolu ma Faletua o Faaiuso e to'a sefuluvalu.

E lima vaega e vaevaeina i ai le mafutaga i kuata taitasi e galulue ai, o le vaega e vaaia le Falesa (*Church Group*), o le vaega e vaaia le A'oga faataitai (*Kindy Group*), o le vaega e vaaia le Fale Mafutaga (*Hall Group*) o le vaega e fesoasoani i le faletusi a le Kolisi (*Library Group*) ma le vaega a le (*Home Group*). O Aso Lua o vaiaso taitasi e fai ai a matou polokalame o meataulima. E faia foi a matou lotu Mafutaga a Tina i le 7 o afiafi o Aso Lulu taitasi i le Chapel a le Kolisi. O nei tapuaiga ua tofia lava i ai nisi o Faletua o faiaoga ma faletua uma o faaiuso e taitaiina i vaiaso uma. O la matou polokalame taalo e faatinoina i Aso Tofi ma ua iai foi le Komiti e taitaiina lea vaega.

Ia avea foi lenei avanoa e momoli ai le Agaga o le Faafetai i le Tinā po o le taitai o le Mafutaga le Faletua o

le Pule, Susuga Samata Uili mo lana taitaiga, fautuaga ma apoapoaiga i la matou mafutaga. Faamalo le onosa'i i le feagai ai ma faigata o le galuega. Momoli foi le faafetai ma le faamalo i le Faletua o le Sui Pule, Susuga Lalokava Lima ma faletua uma o faiaoga o ē ua matou faatina i ai I lenei Kolisi mo fesoasoani ma le lagolagoina foi o le laulau i tiute ma galuega faatino uma.

Faaleoina foi le agaga faafetai ma le faamalo i le Mafutaga a Faletua i vasega taitasi mo la outou tali mai ma la outou lagolago mai i le faafaigofieina o le galuega. E faafetaia ai foi la ma vasega faaiuso mo la outou fesoasoani ma le lagolagosua i vaega uma o la tatou galuega fai faatasi. Malo lava onosa'i ma le faamalolosi i vaega uma a la tatou Mafutaga.

Tau ina faamanuia le Atua i la tatou Mafutaga atoa uma lava. Foai le ola ma le malosi aemaise o le loto onosa'i aua le feagai ai ma tiute ma galuega uma o feagai ai i totonu o le Kolisi.

Ia manuia tele fuafuaga uma o totoe o lenei tausaga i la tatou Mafutaga Faletua 2014.

Faafetai

Lafo Auvele & Alofa Crawley

## MALUAPAPA PRE-SCHOOL



O lenei galuega o loo taitai ai le faletua ia Samata Uili, faatasi ai ma le lagolago a faletua o faiaoga ia Lemapu Faalepo Tuisuga ma Mileneta Tavita Maliko. O faletua o a'oa'o sa fesoasoani i lenei kuata, o Helen Matautia, Sago Viliamu, Tania Lesa, le Pule, Kanona Leota, Ilasa Timoteo, Fofoga Clarke, Fesueai, ma Talalelei Maiava. E toa 17 le aofaiga o alo ma fanau o le aoga faatasi ai ma fanau a faiaoga mai le kolisi Leulumoega Fou.

O tele ni polokalame na aoaoina ai le fanau, i mataupu tau le ola maloloina lelei, o le aganuu faa-Samoa moni, faapea foi le faitauina o tusi ma le a'oa'oina o pese. E amata mai lava i le aso Gafua e o'o i le aso Tofi polokalame le faatinoina o taiala ua uma ona faata'atitia mo vaiaso taitasi sei vagana ai le aso Faraile ua faapitoa mo

le aso ta'alo a le fanau. Sa faaiuina le kuata muamua i le tapenaina lea o le polokalame o le Eseta a le fanau ma tuua ai loa.

Ae avea ia lenei avanoa e momoli atu ai le faafetai i o matou taitai ona o taleni ma agava'a faasoa mai e fesoasoani ma faaleleia ai vaega ese'ese a'o feagai ai mo le a'oa'oina o le fanau i le kuata muamua.

Faafetaia ai foi le fesoasoani i le vaega a le Maluapapa Pre-School i faletua o a'oa'o sa galulue malosi, ua iu manuia ai i le faamoemoe. Ia alofagia e le Atua faiga malologa a le fanau ma le Kolisi. Ia manuia foi le Fono Tele a le Ekalesia.

Ma lo'u faa'alo'alo lava faafetai

Talalelei Maiava



## TAALOGA MAFUTAGA A'OA'O

Na tulaga lelei lava le faasologa o taaloga a le mafutaga i le kuata amata o lenei tausaga. O taaloga masani lava sa faatinoina e aofia ai le lakapi pa'i ma le soka, i au masani o le Lanu Paepae ma le Lanu Uliuli. E faapea foi i le kirikiti faasamoa i au e fa, Lanu Meamata, Lanu Samasama, Lanu Moana ma le Lanu Mumu.

I le lakapi pai ma le soka sa vaaia ai le finau o au e lua i vaiaso taitasi sa faatinoina ai. A lē tutusa, e fesuisui ai au e manumalo i lea vaiaso ma lea vaiaso, se ia oo i le Aso Tofi mulimuli e tauluga ai lenei kuata, na faapena ona manumalo ai le au Lanu Paepae i se taaloga finau tele. I le taamilosaga kirikiti, o le talita na umiaina e le Lanu Meamata mai le 2013, o le Lanu Mumu lea ua faasee atu nei iai le talita i lenei vaituuaga.

E momoli atu ai le faafetai tele i le susuga i le Alii Pule, Sui Pule ma le aiga faiaoga le lagolagosua foi i polokalame taalo o lenei kuata. Faafetai i le taitai komiti, ia Peletisala Limā, faapea Solipo Niulesa le faapalepale ma le onosai i le faatautaia o lenei polokalame. E lē faagaloina foi pa'aga masani o le Kolisi, i susuga i faafeagaiga na auai mai, na maua luga ma matagofie ai lenei faamoemoe.

E faamalulu atu foi pe afai ua iai ni aleu ma ni vaivaiga o le mafutaga nei, i le peresitene & failautusi ma le nofo a suega, ia fale i so outou finagalo faale-Atua e magalo ai mea uma.

Soifua ma ia manuia.

Clay Tofilau, Silipa Silipa, Petelo Puga & Amosa Silipa (komiti o taaloga - Aoao)

## TAALOGA MAFUTAGA FALETUA



“Ia aua lava nei ia tei matou Le Alii e, ae ia foi atu pea le viiga i lau Afio”

E faapena se lagona o lenei Komiti ona o le agalelei ma le taitaiga a le Atua ua faaiuina ai ma le manuia le Polokalame o Taaloga i lenei foi kuata.

O aso Tofi uma lava o vaiaso taitasi o le aso lea ua atofaina mo taaloga a faletua o aoao ma faletua o faiaoga. Ua vaevaeina lenei mafutaga i au e fa. O au nei ua vaevaeina i ai, ma ua faaigoaina i fugalaau eseese ua maua i lo tatou siosiomaga; o Tiare, Puataunofo, Italia, ma Teuila. Sa amata lava taaloga o lenei kuata i mini games, ona faaauau ai lea i le voli mo le kuata atoa, ma faamaea ai foi le kuata i mini games.

Faafetai i le alofa ma le agalelei o le Atua ua iu manuia

lena Kuata ao sologa lelei lava mea uma. Ua matagofie mea uma ona o le galulue faatasi ma le felagolagoma'i o le Komiti o taaloga faatasi ai ma faletua o faiaoga ua taitaiina lenei vaega taua o le ola aotauina. O le vasega faaiuso uma lava o lo o auai i le komiti ma ua uma foi ona tofia taitai i le komiti faapea ai ma le failautusi mo le faafoeina ma faamaumauina i lalo o taaloga taitasi i aso tofi.

Faafetai tele

Komiti o Taaloga

**Faletua o Faiaoga:** Lemapu Tuisuga, Lile Niulesa, Kathryn Chang Fong

**Taitai Komiti:** Kalala Faaeteete

Failautusi: Tine Tuluaau

## AOGA ASO SA I MALUA

**Faifeau:** Rev. Dr. Afereti Uili.

**Faiaoga Aso Sa : (a'oa'o)** Alaifetu Faaitete, Amosa Silipa, Epati So'oula, Etiveni Ta'avao, Farani Puga, Komisi Samuelu, Satala Sa'u; **(faletua)** Lafo Auele, Vicky So'oula, Eseta Tofilau, Lemina Toaivao, Helen Matautia, Talelei Maiava, Aliitasi Fuimaono, Uputaua Malaga; **(faletua o faiaoga)** Samata Uili, Lalokava Lima, Tauai Vaifale, Michi Lima, Maria Samuelu, Lile Niulesa, Josephine F. Leapepe.

Na amatalia Aoga Aso Sa i le aso 16 o Fepuari 2014 a Malua i lenei tausaga. O afiafi o Aso Lua ma aso Faraile o vaiaso taitasi, e feiloai ai faiaoga o vasega taitasi, mo tapenaga o mataupu i vaiaso taitasi, a'o Aso Toonai i le itula e tasi i le aoauli, e faatino ai tapenaga o mataupu i vasega taitasi, aua le silasila ale faifeau ma faiaoga Aso Sa, ina ia lelei atili tapenaga mo le fanau i Aso Sa taitasi (7:30 – 8:40). O Aso Toonai i le 7:30 - 9:30 taaloga a le

fanau.

E viia le alofa ma le agalelei o le Atua, ona ua faaiuina ma le manuia feau ma galuega faa-faiaoga Aso Sa o lenei kuata. E momoli atu le faafetai tele i lau susuga i le Alii Pule o le Kolisi faapea le lagolago a faletua o faiaoga, ma le vasega o a'oa'o ma faletua o le tausaga 4, o e ua ofo atoa mai o outou loto ma agaga, ma o outou taimi i le faatinoina o lenei kuata. Malo le onosai, malo le galulue, faafetai le lototetele. Faafetai foi i matua ma fanau i le lagolagoina o le galuega ale Aoga Aso Sa. O mea ua lelei, o mea ua matagofie, o mea foi ua tauleleia, ia fai lea ma viiga o le Atua. Ia manuia tele le faiga tuuaga a le Kolisi, ma le usuia o le Fono Tele a le tatou Ekalesia, ia auomanu lavatina uma i le faatasi mai o le tatou Tapaau oi le lagi.

Soifua

Mautofiga Mario Tu'uu (Failautusi Aoga Aso Sa).



# TAALOGATAGĀ POLO 2014



**Taaloga ma Ausetalia** - O le Aso 9 ma le Aso 14 o Me na faataunu'u ai taaloga tagā polo e pei ona masani ai i tausaga taitasi i le va o le Kolisi Faafaifeau i Malua ma au malolosi a Matagaluega mai fafo.

O le Aso 9 o Me na tali malo ai (*host*) Matagaluega tuu faatasi a Ausetalia sa lu'i ina le ipu autu (Asiena) lea sa umia e Malua mo ni tausaga se tele. Na amata lava le aso i le viiga o le Atua ina ua mafai ona taitai mai le soifua i susuga i Toeaiina Faatonu, Toeaiina, Faafeagaiga, Aoao, ma Tiakono ae maise le Kolisi i Malua; i le Alii Pule, faiaoga ma aoao faapea le tama malolo ia Otele ma faafeagaiga o loo lagolagosua i le taumafaiga o le au a le Kolisi Faafaifeau.

Ona sosoo ai lea ma le malu taeao ma le faamalamalamaina o tulafono e le komiti, lea na fai ai le Susuga ia Kolia Fiu ma sui o le komiti ia Uikilifi Vaifale ma Kolia Fiu (Ausetalia), Apineru Fasavalu ma Viliamu Chan FOUNG (Malua).

Sa matauina le mata alia ma le finau o au e lua. Felanulanuai ma matagofie foi togiga. O le iuga o le taaloga sa manumalo le au malosai mai Ausetalia i le au taumafai a Malua ma o lea la ua see atu nei le ipu mo lona nofoaga tumau i Ausetalia, ae o le tausaga fou o le a faaauau ai le taaloga lava lea i se isi ipu fou e pei ona faailoa mai e le kapeteni a Ausetalia. O le Susuga lava i le Toeaina Faatonu ia Peleti Toa'iloa, o le kapeteni o le au a Ausetalia sa ia talia le ipu.

Sa faaiuina le aso i se taumafataga na saunia e le Kolisi o Malua ma saunoaga autu i Kapeteni o au e lua. O le Susuga ia Afereti Uili mo le Kolisi i Malua ma le Susuga i le Ta'ita'ifono o le Komiti a le Au Toeaina, Peleti Toailoa mo Ausetalia.

**Taaloga ma Niu Sila i Saute** - O le Aso 14 o Me na faia ai foi le taaloga i le va o le au a le Kolisi ma le au matautia mai le Matagaluega a Niu Sila i Saute lea e faauluulu i le latou kapeteni malosai, le Susuga i le Toeaina Faatonu ia Popo Su'a. Na amata lava i tulaga masani o le taeao, o le viiga o le Atua, malu taeao ma upu faafeiloai mai komiti o taaloga faatasi ai ma le fofogaina o tulafono e le Susuga ia Meki Lauvi (komiti Niu Sila). O se taaloga mataina ona o le malolosi uma o au ae maise le naunau o Niu Sila e puipui le ipu ae faapea foi le finau atu o Malua e aumai le ipu.

O le faaiuga o lenei taaloga, na manumalo le au a le Kolisi, ma ua mau ai nei le ipu i Malua mo lenei foi tausaga. Tele foi ni faailoga faapitoa na tauaaina, ae o le score aupito lelei na tutusa ai au e lua, o le au a le Toeaina ia Senetenari ma le Afioga ia Su'a mai Niu Sila ma le au a le tama malolo ia Otele ma le Faafeagaiga ia Esekia. Na faaiu foi i se taumafataga ma upu faaiu a kapeteni o au e lua ma le feofoofotai ai ma mea alofa.

E momoli ai le faafetai ma le faamalo i au uma sa tausinio i ia aso. I Susuga i Toeaina Faatonu, Susuga i Toeaina, Faafeagaiga, aoao ma tiakono, le tama malolo ia Otele, le Susuga i le alii pule o le Kolisi i Malua, le aiga faiaoga faapea foi susuga i aoao o le Kolisi.

E fia momoli foi le faafetai tele i paaga a lenei Kolisi sa lagolagoina le tatou au; le kamupani a le Blue Sky, Digicel, Seb Sports, Best Youth Academy (Auckland) e ala i toniga ma faailoga sa tauaaina. Faamanuia le Atua e tusa ma le agalelei.

Manuia le Fono Tele a le Ekalesia o lenei tausaga.

## Komiti o le Maluapapa

Aukilani Tuiai, Visiesio Saga, Malutafa Faalili,  
Pasefika Maiava, Vaise Maiava, Leefu Pule  
Malua Theological College  
[www.malua.edu.ws](http://www.malua.edu.ws)  
© 2014